



Sesida dals

24 da mars 2020

Communitgà ils

24 da mars 2020

Protocol nr.

235

Coronavirus (COVID-19)

Scumond general da far fieus al liber

1. Ils 13 da mars 2020 ha la Regenza declerà la situaziun en connex cun il coronavirus (COVID-19) sco situaziun extraordinaria. Sin fundament da l'augment rasant dal dumber da persunas infectadas cun il coronavirus han il Cussegl federal, la Regenza dal chantun Grischun, ils chantuns vischins sco er l'exteriur vischin rinforzà resp. extendì cuntinuadamain las mesiras. La vita publica è restrenschiada fermamain dapertut. Ch'il dumber da persunas infectadas cun il coronavirus sa reduceschia en il chantun Grischun pervia da las mesiras prendidas, dastgass esser il cas il pli baud en intginas emnas. Igl è da far quint ch'ils ospitals sco er las organisaziuns da sustegn polizia, protecziun civila, pumpiers e militar vegnian ad arrivar ils proxims dis e las proximas emnas als cunfins da lur capacitads.
2. Igl è l'incumbensa da las organisaziuns d'acziun da prender mesiras per segirar la situaziun normala durant l'eveniment da corona. Tar il giudicament da las ristgas dals pumpiers stat en il center in incendi da guaud pli grond. Ils onns passads èn vegnids stizzads differents incendis da guaud cun agid d'interpresas d'helicopter civilas, d'elements da l'Armada, da pumpiers d'autras regiuns dal chantun betg pertutgadas sco er d'appartegnetas ed appartegnents da la Protecziun civila medemamain or da differentas regiuns dal chantun. En la situaziun actuala n'èsi betg da far quint da pudair disponer d'avunda pilots d'helicopter e forzas d'acziun da l'Armada sco er da la Protecziun civila. I sto er vegnir partì dal fatg ch'ils pumpiers vegnian medemamain indeblids en quai che concerna il personal, uschia ch'els èn pli che mo occupads cun lur acziuns quotidianas en lur

territoris d'acziun. Tenor il giudicament dals pumpiers sto perquai vegnir minimada la ristga. Quai po vegnir cuntanschì mo cun in scumond da far fieu extraordinari, profilactic per tut il territori chantunal.

3. Per reducir la ristga d'in grond incendi da guaud e pia d'ina gronda chargia per ils pumpiers e per lur organisaziuns partenarias è il Stab directiv chantunal perquai sa decidì d'introducìr temporarmain ina pratica pli rigurusa che usità en connex cun il privel d'incendis da guaud e da cultira. El sa basa qua er sin las enconuschientschas da l'Uffizi da guaud e privels da la natira ch'il privel d'incendis da guaud e da cultira crescha svelt la primavaira, en spezial en lieus senza naiv ch'èn exposts al sulegl. Fegliom setg sco er ervas e chaglias sitgas èn avant maun en abundanza suenter l'enviern e pon facilmain pigliar fieu. In incendi grond sco quel ch'è capità en la Val Mesauc durant la midada da l'onn 2016/17 na pudess en questa situaziun extraordinaria betg vegnir cumbattì cun avunda persunal e cun avunda meds.

4. In scumond da far fieu vala tras lescha en cas d'in privel d'incendis da guaud pli grond (art. 31 da la Lescha chantunala davart il guaud [LCG; DG 920.100]). Ultra da quai pon – en cas da setgira extraordinaria u da stgarsezza extraordinaria d'aua – las vischnancas sco er la Regenza scumandar activitads che augmentan considerablmain il privel da fieu, e quai sin basa da l'art. 11 da la Lescha davart la protecziun preventiva cunter incendis ed ils fatgs da pumpiers en il chantun Grischun (Lescha davart la protecziun cunter incendis; DG 840.100). En il cas qua avant maun n'exista bain ni in privel d'incendis da guaud pli grond ni ina setgira extraordinaria u ina stgarsezza d'aua. Anzi, il scumond da far fieu è inditgà per dumagnar la situaziun extraordinaria actuala. Tant l'art. 48 da la Constituziun dal chantun Grischun (CC; DG 110.100) sco er l'art. 16 al. 1 lit. e da la Lescha davart la protecziun da la populaziun en il chantun Grischun (Lescha davart la protecziun da la populaziun, LPPC; DG 630.000) autoriseschan la Regenza da relaschar dretg d'urgenza, sche grevs disturbis da la segirezza publica smanatschan directamain u èn capitads. La garanzia da forzas d'acziun giustifitgescha il relasch d'in scumond da far fieu.

Sa basond sin l'art. 48 CC en cumbinaziun cun l'art. 31 al. 2 LCG, sin l'art. 11 da la Lescha davart la protecziun cunter incendis e sin l'art. 16 al. 1 lit. e LPPC sco er sin proposta dal Departament da construcziun, traffic e selvicultura

concluda la Regenza:

1. Sin l'entir territori chantunal vala a partir dals 25 da mars 2020 fin a la revocaziun in scumond general da far fieu. Exceptada da quai è la zona d'abitadi, uschenavant ch'i po vegnir observada ina distanza dal guaud da 50 m.
2. Igl è chaussa da las vischnancas, da la Polizia chantunala e dal servetsch forestal da procurar ch'il scumond da far fieu vegnia observà.
3. Il scumond da far fieu vala er per tut ils fuclars permess. Las vischnancas procuran ch'ils fuclars vegnian designads correspondentamain.
4. Communicaziun a tut las vischnancas, a tut ils Departaments ed a tut ils posts da servetsch, al Stab directiv chantunal sco er a la Chanzlia chantunala per la publicaziun en il Fegl uffizial.



En num da la Regenza

Il president:

Dr. Chr. Rathgeb

Il chancelier:

Daniel Spadin